

輯一

認捌花草

以自然生態入詩，記錄細漢時陣
定定看著的花草，透過詩來
「識草木鳥獸之名」。

輯一-1 見笑草

因為占著你的路，誠歹勢，
趕緊合起來，讓你過
愛細膩，阮有刺
袂使相創治
野花嘛是有志氣

見笑草（臺灣話：kian-siàu-tsháu）的葉仔受到外力觸著若像驚歹勢會合起來，開粉紅色的花，梗頂懸有幼幼的刺。

輯一-2 到手芳

我予你的目屎鼓甲一空一空
抹一寡雲南白药恰到手芳
空喙若好嘛袂完全
因為 無法度愛你
我嘛真毋甘

到手芳又名「過手芳」，中醫藥典稱為「藿香」，原產地佇印度，葉仔生做真厚，有真強烈的芳氣，會使改善皮膚癢、燙傷。

輯二

用情詩揀臺語

情詩上會使產生同感的感動，美麗的情詩會留蹣有情人的心肝頭，是甜是苦，攏是人生的滋味。

輯二-1 尾蝶仔

你愛我咒誓

愛你了後，就袂使愛誰

可是，愛人啊！

這個世界太嬌

除了百合 我也恰意玫瑰

阮毋免爭論藏踎心內上深的彼座樹林仔

你從來毋捌去過的蓊蓊密密滿地青苔，暗暝有

發出閃光的草菇不斷寫著甜言蜜語的私境

我猶未問你三千青絲內底藏的彼幅

用殫(phú)色的線畫的草蛇伏行規千里毋肯猶

毋甘拊去的暗語

輯二-2 我佇黃昏的水邊等你

我佇水邊等你

佇黃昏的水邊

等你自東向西

盤山過嶺

跔跡一步一步行向大海

你一分一寸暗落去

惜別的話含佇喙內

毋敢講

只好伸手

一筆一劃借水寫字

水鴨對草裡洩出